

Verwaltungsbuch Hamburg Nr. 6/6
Eingangs 3/5. 906
Beilagen

NORMA ET METHODUS
AGENDORUM IN
SYNODO DIOECESANA
LAVANTINA,

A DIE 6. USQUE AD DIEM 10. MENSIS AUGUSTI ANNI 1906
FACIENDA.

EDENDUM CURAVIT
CELSISSIMUS ET EXCELLENTISSIMUS AC REVERENDISSIMUS
DOMINUS
MICHAEL,
PRINCEPS-EPISCOPUS LAVANTINUS.



MARBURGI, 1906.

SUMPTIBUS PR. EP. ORDINARIATUS LAVANTINI.
TYPIS TYPOGRAPHIAE S. CYRILLI.

51511



wf 25109



Norma et methodus agendorum in quinta Synodo dioecessana Lavantina.

Praeobservanda.

Sollemnitates rituales, a iure praescriptae, in cogenda ac celebranda Synodo dioecessana servandae sunt et absque indulto petito et concesso omitti nequeunt, ita sacra Congregatione Concilii etiam nuperrime et quidem die 29. Julii 1905 declarante.¹

Norma ad celebrandam Synodum episcopalem fusius descripta reperitur in libro de Synodo dioecessana anno Domini 1896 habita, in opere de Synodo anno iubilaeo 1900 facta et in codice de Synodo, anno salutis 1903 coadunata. Ideo norma et methodus gerendorum in Synodo hoc anno concienda parcius delineantur. Exemplar huius ritualis extraditur initio Synodi cuilibet Synoditarum. Actiones Synodi dioecessanae, cuius faciendae norma iuxta rubricas *Caeremonialis Episcoporum* (lib. I. cap. 31) nec non *Pontificalis romani* (part. III. ordo ad

¹ Rescriptum s. Congr. Concil. ad preces Episcopi Marianensis in Brasilia de die 29. Julii 1905. (Acta Sanctae Sedis. Romae, 1905. Vol. XXXVIII. fasc. 5. pag. 276 sq.)

Synodum) hisce obiter explanatur, auxilio divino expedientur in *Congregationibus* et *Sessionibus* omnium ad Synodum convenientium.

Congregationes habebuntur:

- a) *particulares* sive Consilia Consultorum, praesentibus scilicet eis Synoditis, qui pro singulis Consiliis Consultores constituentur;
- b) *generales*, quibus cuncti Synodi *Sodales* et *Officiales* interesse tenentur.

Sessiones publicae illi nominantur omnium Synoditarum *sollemnes* consessus, in quibus ritu sacro per *Caeremoniale* et *Pontificale* praescripto, quae ad Synodum pertinent, peraguntur, et quae in Synodo decreta sunt, sollemniter promulgantur.

Expediuntur vero actiones synodales tribus *Sessionibus* publicis, quibus quinque *Congregationes generales* praemittentur, pridie cuiuslibet Sessionis publicae habendae. *Congregationes particulares* seu consultationes *quatuor Consiliorum* locum habebunt tempore libero.

Sessiones publicae et *Congregationes generales* celebrabuntur in sanctuario s. Aloysii. *Congregationes particulares* habebuntur partim in seminario clericorum, partim in convictu epheborum vel vero aliis in locis convenientibus.



De prima Congregatione generali.

Ad rite constituendas actiones *primae Sessionis publicae* pridie hora quarta pomeridiana habebitur *prima Congregatio generalis*.

1. Omnes ad Synodum vocati in eaque comparentes : de saeculari Clero veste talari et choralis cum birreto, de regulari vero habitu sui ordinis et superpelliceis seu cottis induti et cum decenti tonsura congregantur in ecclesia cathedrali s. Ioannis Baptistae. Exinde procedent cruce ecclesiae cathedralis praelata in *Episcopium*, unde erit sollemnis supplicatio seu processio in synodale templum s. Aloysii, campanis ecclesiae cathedralis indesinenter pulsandis.

2. In processione servatur ordo, ut sequitur :

Praecedet inter duos clericos ceroferarios *cruz* ecclesiae cathedralis, gestata ab iuniore e Clero. Hanc sequetur *Clerus* iuxta dignitatem et ordinationis prioritatem.

Praeibunt *sacerdotes* (regulares et saeculares), *qui non sunt beneficiati* cum cura animarum. Subsequuntur *administratores* et *superiores* ordinum; dein *parochi* et *decani*, stolis coloris rubri ornati.

Succedent *doctores* philosophiae christianae, *doctores* romani in iure canonico, dein sacrae Theologiae *doctores*, porro studii theologici dioecesani *professores*, instituti puerorum *rectores* et seminarii clericorum *directores*.

Porro *Praepositus* Petoviensis et *Abbas* saecularis Celeiensis.

Perillustris *Abbas* Trappistarum vel ab eo *Ablegatus*.

Clerus ecclesiae cathedralis. *Magistri caeremoniarum*, acolythi et ministri pro assistentia.

Capitulum cathedrale in corpore procedet.

Reverendissimus sacrorum *Antistes* cum suo comitatu.

3. Bini gravi et lento decoroque passu procedent cum reverentia et religiosa devotione, ut externo iam exemplo populus ad pietatem excitetur.
4. Pie ac religiose supplicationi interessentibus et infra allegatos *hymnos* et *psalmos* recitantibus 50 dies de vera indulgentia in consueta Ecclesiae forma vigore indulti de die 28. Augusti 1903 conceduntur.

Hymni.

In gloriam sacratissimi Cordis Iesu.

Cor, arca legem cóntinens
Non servitútis vétëris,
Sed grátiae, sed véniae,
Sed et misericórdiae.

Cor, sanctuárium novi
Intemerátum fœderis,
Templum vetústo sánctius,
Velúmque scisso útilius.

Te vulnerátum cháritas
Ictu paténti vóluit,
Amóris invisibilis
Ut venerémur vúlnera.

Hoc sub amóris sýmbolo
 Passus cruénta et mýstica,
 Utrúmque sacrificium
 Christus sacérdos óbtulit.

Quis non amántem rédamet?
 Quis non redémptus diligit,
 Et corde in isto séligat
 Aetérna tabernácula?

Decus Parénti, et Fílio,
 Sanctóque sit Spiritui,
 Quibus potéstas, glória,
 Regnúmque in omne est saeculum. Amen.

In honorem purissimi Cordis Mariae.¹

Cor melle dulci dulcius,
 Coeleste manna proferens:
 Cor sole puro purius,
 Incomprehensa continens.

Cor aula Regum Principis:
 Dignum Dei sacrarium:
 Arca superni foederis:
 Altare pacis aureum.

¹ Nicol. Nilles S. J., De rationibus festorum sacratissimi
 Cordis Iesu et purissimi Cordis Mariae. Oeniponte, 1885. Tom. II. lib.
 III. part. 2. pag. 411.

O Cor Matris dulcissimum!
Iucunda spes mortalium:
Pars nostra, vita, gaudium,
Dulcedo, lux, solatium.

Tu fons perennis gratiae:
Spes et salus clientibus:
Abyssus indulgentiae:
Portusque naufragantibus.

Sidus micans amantium,
Sol esto, duxque mentibus:
Fornax amoris, omnium
Accende flammās cordibus.

Hoc sontis Evae filios
Nunc, Virgo, Corde protege:
Hoc et tuos iam filios
Mortis sub horam suscipe.

Per Cor matris purissimum
Iesu tibi sit gloria:
Cum Patre et almo Spiritu
In sempiterna saecula. Amen.

In laudes sanctorum Angelorum.

Te splendor et virtus Patris,
Te vita, Jesu, cōrdium,
Ab ore qui pendent tuo,
Laudāmus inter Angelos.

Tibi mille densa millium
Ducum coróna militat:
Sed explicat victor crucem
Míchaël salútis signifer.

Dracónis hic dirum caput
In ima pellit tártara,
Ducémque cum rebéllibus
Coelésti ab arce fúlminat.

Contra ducem supérbiae
Sequámur hunc nos principem,
Ut detur ex Agni throno
Nobis coróna glóriæ.

Patri, simúlque Fílio,
Tibíque Sancte Spíritus,
Sicut fuit, sit iúgiter
Sæclum per omne gloria. Amen.

In laudes ss. Cyrilli et Methodii, Pontificum et
Confessorum.

Lux o decóra patriæ
Slavísque amíca géntibus,
Salvéte, fratres: ánnuo
Vos efferémus cántico.

Quos Roma plaudens excipit,
Compléxa mater filios,
Auget coróna praesulum,
Novóque firmat róbre.

Terras ad usque bárbaras
Inférre Christum périgitis:
Quot vanus error lúserat,
Almo replétis lúmine.

Noxis solúta péctora
Ardor supérnus ábripit;
Mutátur horror véprium
In sanctitátis flósculos.

Et nunc seréna coelitum
Locáti in aula, súpplíci
Adéste voto: Slávicas
Serváte gentes Númini.

Erróre mersos únicum
Ovíle Christi cóngreget;
Factis avítis aemula
Fides viréscat púlchríor.

Tu nos, beáta Trínitas,
Coelésti amóre cóncita,
Patrúmque natos ínclýta
Da pérsequi vestígia. Amen.

Psalmi.

Psalmus 15.

Conserva me, Domine, quoniam speravi in te.
* Dixi Domino: Deus meus es tu, quoniam bonorum meorum non eges.

Sanctis, qui sunt in terra eius, * mirificavit omnes voluntates meas in eis.

Multiplicatae sunt infirmitates eorum: * postea acceleraverunt.

Non congregabo conventicula eorum de sanguinibus, * nec memor ero nominum eorum per labia mea.

Dominus pars hereditatis meae et calicis mei: * tu es, qui restitues hereditatem meam mihi.

Funes ceciderunt mihi in praeclaris: * etenim hereditas mea praeclara est mihi.

Benedicam Dominum, qui tribuit mihi intellectum: * insuper et usque ad noctem increpuerunt me renes mei.

Providebam Dominum in conspectu meo semper, * quoniam a dextris es mihi, ne commovear.

Propter hoc laetatum est cor meum, et exultavit lingua mea: * insuper et caro mea requiescet in spe.

Quoniam non derelinques animam meam in inferno, * nec dabis sanctum tuum videre corruptionem.

Notas mihi fecisti vias vitae, adimplebis me
laetitia cum vultu tuo: * delectationes in dextera
tua usque in finem.

Gloria Patri etc.

Psalmus 85.

Inclina, Domine, aurem tuam, et exaudi me: *
quoniam inops et pauper sum ego.

Custodi animam meam, quoniam sanctus
sum: * salvum fac servum tuum, Deus meus, spe-
rantem in te.

Miserere mei, Domine, quoniam ad te cla-
mavi tota die: * Laetifica animam servi tui, quo-
niam ad te, Domine, animam meam levavi.

Quoniam tu, Domine, suavis et mitis, * et
multae misericordiae omnibus invocantibus te.

Auribus percipe, Domine, orationem meam, *
et intende voci deprecationis meae.

In die tribulationis meae clamavi ad te, *
quia exaudisti me.

Non est similis tui in diis, Domine, * et non
est secundum opera tua.

Omnes gentes, quascumque fecisti, venient,
et adorabunt coram te, Domine: * et glorificabunt
nomen tuum.

Quoniam magnus es tu, et faciens mira-
bilia: * tu es Deus solus.

Deduc me, Domine, in via tua, et ingrediar
in veritate tua: * laetetur cor meum, ut timeat
nomen tuum.

Confitebor tibi, Domine Deus meus, in toto corde meo, * et glorificabo nomen tuum in aeternum.

Quia misericordia tua magna est super me, * et eruisti animam meam ex inferno inferiori.

Deus, iniqui insurrexerunt super me, et synagoga potentium quaesierunt animam meam, * et non proposuerunt te in conspectu suo.

Et tu, Domine Deus miserator et misericors, * patiens, et multae misericordiae, et verax.

Respice in me, et miserere mei: * da imperium tuum puero tuo, et salvum fac filium ancillae tuae.

Fac mecum signum in bonum, ut videant, qui oderunt me, et confundantur, * quoniam tu, Domine, adiuvisti me, et consolatus es me.

Gloria Patri etc.

Psalmus 120.

Levavi oculos meos in montes, * unde veniet auxilium mihi.

Auxilium meum a Domino, * qui fecit coelum et terram.

Non det in commotionem pedem tuum: * neque dormitet, qui custodit te.

Ecce, non dormitabit, neque dormiet, * qui custodit Israel.

Dominus custodit te, Dominus protectio tua, * super manum dexteram tuam.

Per diem sol non uret te, * neque luna per noctem.

Dominus custodit te ab omni malo: * custodiat animam tuam Dominus.

Dominus custodiat introitum tuum et exitum
tuum: * ex hoc nunc et usque in saeculum.

Gloria Patri etc.

Psalmus 132.

Ecce quam bonum et quam iucundum * habitare
fratres in unum!

Sicut unguentum in capite, * quod descendit in
barbam, barbam Aaron:

Quod descendit in oram vestimenti eius: * sicut
ros Hermon, qui descendit in montem Sion.
Quoniam illic mandavit Dominus benedictionem *
et vitam usque in saeculum.

Gloria Patri etc.

Sub finem dicitur Antiphona *Salve regina* cum
V. et R. et Oratione: *Omnipotens, sempiterna Deus.*

5. In ingressu synodalis sacelli s. Aloysii omnes passum
sistent, et Reverendissimus Praesul *accepto aspergillo*
de more asperget aqua lustrali et medium inter Syn-
oditas, comitatus a Capitulo cathedrali, accedet ad
altare maius.
6. Dum Ipse, peracta sanctissimi Sacramenti adoratione,
assumit in throno paramenta sacra, idem facientibus,
qui Ei assistant, in sacristia, Synoditae quiete occu-
pabunt sedilia; quae in ecclesiae navi a dextris et
a sinistris parata sunt, prout eis loca Magister cae-
remoniarum assignabit. Haec loca, durante Synodo,
singuli tenebunt; attamen hic ordo, toto Synodi
tempore stricte observandus, nullum honori vel di-
gnitati fert praeiudicium.

7. In *sessionibus publicis* omnes Synodales superpelliceis et birretis induti erunt. In *congregationibus* saeculares Synoditae veste talari cum birreto, regulares habitu sui ordinis, *Officiales* autem superpelliceo seu cotta super vestem talarem vestiti comparebunt.

8. Ad Missas synodales et alias sacras functiones, quae peragentur, assistant et inservient Synodales ex ordine, qui a Magistro caeremoniarum, annuente Reverendissimo Ordinario, designabuntur.

Chorus Capituli cathedralis pro tempore Synodi, exceptis eis, quae in communi cum Synoditis fient, suspenditur.

9. Omnibus paratis, Antistes accipit paramenta sacra et coram exposito augustissimo Sacramento intonat Sequentiam: *Veni, Sancte Spiritus*, qua a choro abluta, cantat relativum *versiculum* et respectivam *collectam* de Spiritu Sancto.¹

10. Data benedictione et Sanctissimo reposito, Episcopus deponit sacras vestes et reassumit mozettam. Sequitur *sacra dictio* salutatoria et introductoria.

Post sermonem inauguralem legitur de pulpito amovibili *decretum de Officialibus Synodi*. Quo praelecto Synodi *Promotores, Secretarius, Notarius* et *Procuratores* Cleri loca designata occupabunt, officio ac munere sibi commissio functuri.

11. Actutum accedens ad sedem Episcopi *Promotor*² instabit, ut *actiones synodales* indicantur et praepa-

¹ Pag. 29, 30. — ² Si fuerint duo Promotores, in formula dicatur: Nos N. et N. huius Synodi Promotores . .

rentur; *Secretarius* vero, accepto Praesulis mandato, leget *summarium* istarum actionum.

12. Sequitur *Promotoris* instantia de constituendis *quatuor Consiliis* pro deliberanda et examinanda Synodi materia. Exposita per Reverendissimum Synodi Praesidem methodo, qua consultationes in *Congregationibus particularibus* expediendae erunt, praelegentur nomina eorum, quos sacrorum Antistes *quatuor Consiliorum* Praesides, Consultores, Referentes et Notarios elegerit: quibus confestim extraditur materia deliberanda.
13. Sequitur *Promotoris* instantia de constituendis et respective approbandis in Synodo *Examinatoribus Cleri*. Praelectis per *Secretarium* nominibus eorum, quos Reverendissimus Ordinarius constituit *Examinatores ordinandorum*, proponuntur per Celsissimum Principem-Episcopum *Examinatores promovendorum ad beneficia curata*, in Synodo approbandi. Facto dein per *diribitores scrutinio*, publicantur data occasione nomina eorum, quos Synodus approbavit.
14. Homagium a Synoditis per telegraphum significandum Sanctissimo Patri Pio X., Eminentissimo Domino Ioanni Bapt. Cardinali Katschthaler, Principi-Archiepiscopo et Metropolitae Salisburgensi, itemque Suae caesareae ac regiae Apostolicae Maestati, augustissimo Imperatori Francisco Iosepho I.
15. Indicta dein ad *Promotoris* instantiam *prima Sessione publica*, finis imponitur Congregationi primae *gratiarum actione*.¹ Qua peracta Episcopus discedit, comitante Ipsum Capitulo usque ad valvas ecclesiae.

¹ Pag. 31.

Quo facto Congregatio dimittitur. In discessu post actiones synodales, ut servetur ordo et vitetur confusio, digniores priori loco abscedant.

16. Eodem vespere ab hora sexta per duos quadrantes campanae ecclesiae cathedralis s. Ioannis Baptistae, ecclesiae parochialis beatae Virginis Mariae, matris misericordiae, ecclesiae filialis s. Barbarae, ecclesiae synodalis s. Aloysii, ecclesiae beatae Virginis Mariae apud scholares sorores tertii ordinis s. Francisci Assisinensis, porro ecclesiae parochialis s. Magdalenae et ecclesiae s. Ioseph apud sacerdotes missionarios s. Vincentii a Paulo sollemni ritu pulsantur.

Affulsit enim dies optatissima quintae Synodi dioecesanæ!



De prima Sessione sollemni.

Hora septima matutina omnes Synodi *Officiales* et *Sodales* congregiuntur in domo sacra s. Aloysii, occupant sua subsellia et expectant adventum Celsissimi ac Reverendissimi Principis-Episcopi.

Eum cappa indutum et curru advectum excipit Capitulum cathedrale ad atrium ecclesiae Ipsumque ad altare maius deducit.

Mox quum Illustrissimus Antistes sedem suam occupaverit, persolvitur *Tertia*. Qua finita et rite paratis omnibus, quae ad Sacrum requiruntur, procedit Episcopus ad *altare* et intonat hymnum: *Veni, Creator Spiritus*. Absolutis dein versiculo, responsorio et huc spectante oratione

celebrabit *Missam de Spiritu Sancto*. (Gloria, unica Oratio, Credo, Praefatio de Spiritu Sancto et ultimum Evangelium s. Ioannis). Incensatur Clerus.

Finita Missa Pontifex depositis paramentis, Missae propriis, usque ad stolam exclusive accipit *pluviale* rubrum cum mitra pretiosa, accedit ad altare et genuflexus sine mitra incipit Antiphonam: *Exaudi*, deinde omnes surgunt et persolvunt *preces*, quas Pontificale romanum *pro prima Sessione* praecipit.¹

Recedentibus Acolythis, deponit Episcopus paramenta, induit vestes pro Synodo et exorditur *Sessionem sollemnem*, si tempus permiserit, *sermone synodali*.

Quo audito, *Promotor* more in Synodis usitato instabit pro publicatione *Decretorum*, formam Synodi responentium, videlicet *de aperienda Synodo, de emittenda professione fidei, de Ministris synodalibus, de praeiudicio non afferendo, de modo vivendi in Synodo, de servando secreto et de non discedendo*.

Singula decreta *Secretarius*, accepta de manu Episcopi, praeleget de pulpito amovibili.

Ad lectionem *Decreti de emittenda fidei professione* surgit Episcopus et mitra deposita, conversus *ad altare* genuflectit et manu dextera libro sanctorum Evangeliorum admota, alta voce *professionem fidei* emittit, id est recitat, caeteris Synodalibus una cum Eo recitantibus, formulam fidei Tridentino-Vaticanam. Hic actus est actus summae religionis.

¹ Pag. 32—41.

Forma professionis fidei Tridentino- Vaticana.

Ego N. firma fide credo et profiteor omnia et singula, quae continentur in Symbolo fidei, quo sancta Romana Ecclesia utitur, videlicet: Credo in unum Deum, Patrem omnipotentem, factorem coeli et terrae, visibilium omnium et invisibilium. Et in unum Dominum Iesum Christum, Filium Dei unigenitum. Et ex Patre natum ante omnia saecula. Deum de Deo, lumen de lumine, Deum verum de Deo vero. Genitum, non factum, consubstantialem Patri, per quem omnia facta sunt. Qui propter nos homines, et propter nostram salutem descendit de coelis. Et incarnatus est de Spiritu Sancto ex Maria virgine: et homo factus est. Crucifixus etiam pro nobis sub Pontio Pilato passus et sepultus est. Et resurrexit tertia die secundum Scripturas. Et ascendit in coelum; sedet ad dexteram Patris. Et iterum venturus est cum gloria iudicare vivos et mortuos: cuius regni non erit finis. Et in Spiritum Sanctum, Dominum et vivificantem, qui ex Patre Filioque procedit. Qui cum Patre et Filio simul adoratur et conglorificatur: qui locutus est per Prophetas. Et unam sanctam catholicam et apostolicam Ecclesiam. Confiteor unum baptisma in remissionem peccatorum. Et expecto resurrectionem mortuorum. Et vitam venturi saeculi. Amen.

Apostolicas et ecclesiasticas traditiones, reliquasque eiusdem Ecclesiae observationes et constitutiones firmissime admitto et amplector. Item sacram Scripturam iuxta eum sensum, quem tenuit et tenet sancta mater Ecclesia, cuius est iudicare de vero sensu et interpretatione sacrarum

Scripturarum, admitto; nec eam umquam nisi iuxta unanimum consensum Patrum accipiam et interpretabor.

Profiteor quoque, septem esse vere et proprie Sacramenta novae legis, a Iesu Christo Domino nostro instituta, atque ad salutem humani generis, licet non omnia singulis necessaria, scilicet Baptismum, Confirmationem, Eucharistiam, Poenitentiam, Extremam Unctionem, Ordinem et Matrimonium; illaque gratiam conferre, et ex his Baptismum, Confirmationem et Ordinem sine sacrilegio reiterari non posse. Receptos quoque et approbatos Ecclesiae catholicae ritus, in supradictorum omnium Sacramentorum sollemni administratione recipio et admitto; omnia et singula, quae de peccato originali et de iustificatione in sacrosancta Tridentina Synodo definita et declarata fuerunt, amplector et recipio.

Profiteor pariter, in Missa offerri Deo verum, proprium et propitiatorium sacrificium, pro vivis et defunctis; atque in sanctissimo Eucharistiae Sacramento esse vere, realiter et substantialiter corpus et sanguinem una cum anima et divinitate Domini nostri Iesu Christi, fierique conversionem totius substantiae panis in corpus et totius substantiae vini in sanguinem, quam conversionem catholica Ecclesia Transsubstantiationem appellat. Fateor etiam, sub altera tantum specie totum atque integrum Christum, verumque Sacramentum sumi.

Constanter teneo, Purgatorium esse animasque ibi detentas fidelium suffragiis iuvare. Similiter et Sanctos, una cum Christo regnantes, venerandos atque invocandos esse, eosque orationes Deo pro nobis offerre, atque eorum reliquias esse venerandas. Firmissime assero, imagines Christi ac Deiparae semper virginis nec non aliorum Sanctorum

habendas et retinendas esse, atque eis debitum honorem ac venerationem impertiendam. Indulgentiarum etiam potestatem a Christo in Ecclesia relictam fuisse, illarumque usum christiano populo maxime salutarem esse affirmo. Sanctam catholicam et apostolicam Romanam Ecclesiam omnium Ecclesiarum matrem et magistram agnosco; Romanoque Pontifici, beati Petri Apostolorum principis successori ac Iesu Christi Vicario, veram obedientiam spondeo ac iuro. Caetera item omnia a sacris canonibus et oecumenicis Conciliis ac praecipue a sacrosancta Tridentina Synodo et ab oecumenico Concilio Vaticano tradita, definita et declarata, praesertim de Romani Pontificis primatu et infallibili magisterio indubitanter recipio atque profiteor; simulque contraria omnia, atque haereses quascumque ab Ecclesia damnatas et reiectas et anathematizatas, ego pariter damno, relicio et anathematizo.

Hanc veram catholicam fidem, extra quam nemo salvus esse potest, quam in praesenti sponte profiteor et veraciter teneo, eandem integram et inviolatam, usque ad extremum vitae spiritum, constantissime Deo adiuvente retinere et confiteri, atque a meis subditis vel illis, quorum cura ad me in munere meo spectabit, teneri, doceri et praedicari, quantum in me erit, curaturum: ego idem N. spondeo, voveo ac iuro. Sic me Deus adiuvet, et haec sancta Dei Evangelia! —

Facta recitatione, Antistes in genua provolutus et dextera sacrosanctis Evangeliiis imposita *iuramentum* emittit in hanc formam: *Ego Michael, Princeps-Episcopus Lavantinus, promitto, spondeo, profiteor, detestor, anathematizo, voveo et iuro iuxta professionis fidei formulam a Pio IV.*

et Pio IX. praescriptam, singula singulis referendo: *Sic me Deus adiuvet et haec sancta Dei Evangelia!*

Postea sedens accipit mitram et Evangeliarium sustinens apertum super genua excipit iuramentum omnium in Synodo congregatorum, qui *trini* ac *trini* mox accedunt et flexis genibus tres digitos manus dexteræ, in sollemni iureiurando elevari solitos, nudos ponunt super initium *sancti Evangelii secundum Ioannem* atque formulam iuramenti finalem pronuntiant: *Ego idem N. N. spondeo, voveo ac iuro. Sic me Deus adiuvet et haec sancta Dei Evangelia!* Quibus dictis, osculantur textum Evangelii,¹ et sessum redeunt.

Ad instantiam *Promotoris*, annuente Praesule, promulgatur per *Secretarium* decretum de approbatis in Synodo *Examinatoribus promovendorum ad beneficia curata*, qui, si praesentes fuerint, protinus accedunt ad Ordinarium, sollemni iuramento devinciendi.

Promulgatis dein, quæ Reverendissimus Synodi Praeses in hac prima Sessione sollemni promulganda decrevit, instabit *Promotor*, ut proxima *Sessio publica* indigetur et ut de peractis in Sessione praesenti et de aliis actionibus synodalibus conficiatur *Memoriale authenticum*.

Quibus absolutis, Episcopus *sollemnem benedictionem pastorem* impertitur. Qua data, deponit vestes, et ordinato per mediam navim ecclesiae recessu, Clerum in ianua ecclesiae dimittit et rheda in suas Aedes episcopales redit.



¹ Cfr. Collectio rituum diocesis Lavantinae. Marburgi, 1896. Pag. 437—441.

De Congregationibus particularibus.

Actiones *Congregationum particularium* expediuntur per quatuor *Consilia*, quibus singulis Reverendissimus Praesul peculiarem materiae synodalis partem committet deliberandam.

Sessiones istorum *Consiliorum* habebuntur tempore libero et opportuno. Pro quolibet *Consilio* parabitur in aedibus seminarii clericorum et ephebei adolescentium peculiare *conclave*, in quo eiusdem *Consilii consultores* hora accurate determinanda ad faciendam actionem synodalem convenient.

Actioni praemittuntur *preces*¹, per Consultores dicendae. Designati *Praesidis* erit, consultationes optimo quo poterit modo dirigere et curare, ut vota, desideria, mutationes aliaque huius generis scriptis mandentur, seu ut de actione Sessionis per *Notarium* conficiatur *Protocollum*, finita congregatione praelegendum et Reverendissimo Episcopo, cum eodem die ad faciendam *Congregationem generalem* venerit, proponendum.

Ad *Praesides* horum *Consiliorum* pertinebit quoque, ut *Procuratoribus* Cleri in scriptis tribuant *consilia* singulorum Consultorum, quatenus isti petierint, ut de his suis consiliis et sententiis in Congregationibus generalibus, annuente Ordinario, publice disseratur.

In fine Sessionum persolvenda est *gratiarum actio*.²



¹ Pag. 30. — ² Pag. 31.

De secunda Congregatione generali.

Quo die prima Sessio sollemnis celebrata est, post meridiem *hora quarta* instituetur *secunda Synodi Congregatio generalis*.

Praefixa hora convenient Synodales in fano s. Aloysii. Antistite, more solito adveniente, persolventur *Vesperae cum Completorio*. Quibus finitis pro consuetudine Synodorum incipit *actio synodalis* precibus, ante actionem synodalem persolvendis.¹

Habebitur *prima meditatio*. Eius fine facto, Episcopus, prout opportunum duxerit, dilucidabit singulas propositae materiae synodalis partes.

Quibus actis instabit *Promotor*, ut vota et petita Cleri per illius *Procuratores* dilucidentur.

Quibus auditis et pro posse exauditis, Reverendissimus Praelatus instruit Clerum de *Iudicibus in partibus*, et si Ei placuerit, Clero renuntiat, quos huic obeundo muneri devinciendos statuerit.

Pari modo, si Ei in Domino consultum videbitur, eligit ac nominat viros, quos *Iudicii sui dioecesani* pro causis criminalibus et civilibus nec non *Tribunalis ecclesiastici* pro causis matrimonialibus constituerit *Consiliarios*.


His peractis ad *Promotoris* instantiam et Ordinarii concessionem praelegetur per *Secretarium* summarium proximae *Sessionis sollemnis*, qua indicta, *preces pro gratiarum actione* absolvuntur.²

Hisce congregatione generali rite conclusa, Episcopus comitante Capitulo cathedrali, uti de more, discedit.

Q

¹ Pag. 30. — ² Pag. 31.

Indicta *Sessione sollemni proxima*, Celsissimus Princeps-Episcopus *benedictionem pontificalem* elargitur. Dein depositis vestibibus factoque recessu Clerum in ostio sacelli synodalis dimittit, et in Palatium suum curru vehitur.



De tertia, quarta et quinta Congregatione generali.

1. A meridie eiusdem diei seu feriae quartae *hora quarta* perficitur *tertia Congregatio generalis* ritu et modo, quo superius dictum est de secunda Congregatione.

Habebitur *secunda meditatio qua consideratio*. Caetera evolvuntur uti in altera Congregatione generali.

Eodem iam vespere et mane proximae diei, praebetur Synoditis occasio sacramentaliter confitendi.

2. Die sequenti peragetur *quarta Congregatio generalis*, ad quam Clerus synodalis eadem hora et eodem modo conveniet, prouti describitur in secunda Sessione publica.

Quum in ecclesiam more solito venerit Celsissimus Praesul, recitabitur *Tertia*, qua persoluta, celebratur per Canonicum Capituli cathedralis *Missa de die festo*, cui Episcopus assistet, *pluviali rubri coloris* indutus. Synoditae recitabunt sacratissimum Rosarium gloriosum.

Finita Missa, datur initium *Congregationi* precibus, ad hoc praescriptis. Deinceps habebitur *meditatio tertia*. Qua audita pertractabitur materia synodalis, prout in Domino Illustrissimus Antistes iudicaverit et decreverit.

Quibus actis, fiant preces *pro gratiarum actione*.
Datis Deo gratiis, comitabitur Episcopum Capitulum
cathedrale usque ad seras ecclesiae et Synoditae
discedent.

Dein est tempus liberum *pro facienda confessione
sacramentali*.

3. Hora quarta instituetur quinta et ultima Congregatio
generalis, modo superius descripto.

In hac Congregatione pertractabitur omnis materia
synodalis, quae adhuc superfuerit.



De tertia et ultima Sessione publica.

Die sequenti celebrabitur *Sessio publica finalis*, ad
quam Clerus synodalis hora sexta — vel vero alia iuxta
circumstantias temporis et personarum adiuncta adhuc sta-
tuenda — et eodem modo, ut superius notatum est, con-
gregabitur.

Absoluta, quum Synodi Praesul advenerit, *Tertia*,
cantatur per Ipsum *Missa de sanctissima Trinitate* (ad-
dita sub distincta conclusione *Collecta* pro gratiarum
actione). *Incensatur* Clerus. Post Pontificis communionem
Sacerdotes, assumptis stolis, accedunt ad sacram commu-
nionem, qua accepta sumunt *ablutionem*.

Finita Missa pontificali, inchoatur *Sessio postrema*
precibus, quae in Pontificali romano *pro tertia die Synodi*
ponuntur.¹

¹ Pag. 45—48.

Deintus leguntur et publicantur, quae Antistes decreverit. Post haec vocabuntur nominatim omnes, qui huic Synodo dioecesanae interesse debuerint, et respondebit ad suum quisque nomen: *Adsum*. Absentes notentur aliquo signo v. gr. lineola. Contra sine causa iusta absentes animadverti potest censuris, etiam excommunicatione aliisve poenis, atque etiam mulctis pecuniariis.

Sequitur *finalis allocutio* Celsissimi ac Reverendissimi Principis-Episcopi, in qua Clerum potissimum de libenti ac simplici, de hilari ac virili deque humili, integra et perseverante observantia Constitutionum synodaliū monebit.

Postea ad instantiam Promotoris legitur *decretum* cum de *Synodo finienda*, tum de *proxime habenda*. Episcopus, unicus in Synodo iudex, *subscribit* statutis.

Tandem ad altare maius exponetur sanctissimum Sacramentum. Quo incensato, intonat Antistes hymnum: *Te Deum laudamus*, quem chōrus et Clerus alta voce prosequuntur. Hymno dicto et relativae orationi subnectitur oratio finalis: *Nulla est, Domine*.¹

Immediate renovabitur *dedicatio et consecratio* dioeceseos sacratissimo Cordi Iesu,² uti id factum est in Synodis annis 1896, 1900 et 1903 coactis. Impraesentiarum accedit *Synoditarum commendatio et oblatio* Cordi purissimo beatae Mariae Virginis.³

Quo facto cantatur ter *Sanctus* et datur *benedictio sacramentalis*.

Reposito Venerabili, *aperiuntur portae ecclesiae synodalis*. Deinde *publicantur Indulgentiae concessae*, porro praelegitur *decretum de Synodo dimittenda*.

¹ Pag. 48. — ² Pag. 49. — ³ Pag. 50.

Post haec persolvuntur *vota* cum *oratione*¹ et imper-
titur Clero et praesentibus laicis *benedictio sollemnis*.

Denique Archidiaconus, stans iuxta Pontificem, dicet
voce elevata: *Recedamus in pace*, et acclamabunt omnes:
In nomine Christi!

Omnibus rite peractis, Excellentissimus Praesul de-
ponit sacras vestes et ordinato recessu Clerum in foribus
ecclesiae in nomine Domini dimittit atque in Aulam suam
se confert.



Preces in Synodo persolvendae.

a) Invocatio Spiritus Sancti ad initiationem et ape- ritionem Synodi in prima Congregatione generali.

Reverendissimus Officiator intonat *Sequentiam*: *Veni*,
Sancte Spiritus, (quam chorus et Clerus cantando pro-
sequuntur):

Et emitte coelitus * Lucis tuae rádium.

Veni, Pater paúperum, * Veni, dator múnorum, *
Veni, lumen córdium.

Consolátor óptime * Dulcis hospes ánimae *
Dulce refrigerium.

In labóre réquies * In aestu tempéries * In fletu
solátium.

O lux beatíssima * Reple cordis íntima * Tuórum
fidélium.

Sine tuo númine * Nihil est in hómine * Nihil
est innóxiúm.

Lava, quod est sórdidum * Riga, quod est ári-
dum * Sana, quod est saúciúm.

¹ Pag. 51 — 53.

Flecte, quod est rigidum * Fove, quod est frigidum * Rege, quod est devium.

Da tuis fidelibus * In te confidentibus * Sacrum septenarium.

Da virtutis meritum * Da salutis exitum * Da perenne gaudium. Amen.

V. Emitte Spiritum tuum, et creabuntur.

R. Et renovabis faciem terrae.

Oremus. Deus, qui corda fidelium Sancti Spiritus illustratione docuisti, da nobis in eodem Spiritu recta sapere, et de eius semper consolatione gaudere. Per Dominum nostrum Iesum Christum Filium tuum, qui tecum vivit et regnat in unitate eiusdem Spiritus Sancti Deus per omnia saecula saeculorum. R. Amen.

b) In Congregationibus quatuor generalibus et cunctis particularibus.

1. Ante actionem synodalem.

Antiphona: Veni, Sancte Spiritus (quam Synoditae prosequuntur): Reple tuorum corda fidelium et tui amoris in eis ignem accende, qui per diversitatem linguarum cunctarum gentes in unitate fidei congregasti.

V. Emitte Spiritum tuum, et creabuntur.

R. Et renovabis faciem terrae.

V. Dominus vobiscum.

R. Et cum spiritu tuo.

Oremus. Deus, qui corda fidelium Sancti Spiritus illustratione docuisti, da nobis in eodem Spiritu recta sapere, et de eius semper consolatione gaudere. Per Dominum nostrum Iesum Christum Filium tuum, qui tecum

vivit et regnat in unitate eiusdem Spiritus Sancti Deus per omnia saecula saeculorum. R. Amen.

2. Post actionem synodalem.

Antiphona: Confirma hoc Deus, quod operatus es in nobis, a templo sancto tuo, quod est in Ierusalem.

V. Benedicamus Patrem et Filium cum Sancto Spiritu.

R. Laudemus et superexaltemus eum in saecula.

Oremus. Deus, apud quem pro perceptis donis gratitudo secure est alterius beneficii impetratio, da nobis dignas Tibi pro collatis beneficiis gratias rependere, ut misericordiam Tuam ad impertienda nobis nova bona provocemus. Per Christum Dominum nostrum. R. Amen.

Sequitur oratio, ab omnibus recitanda:

Sub tuum praesidium confugimus — sancta Dei genitrix — nostras deprecationes ne despicias in necessitatibus nostris — sed a periculis cunctis — libera nos semper — Virgo gloriosa et benedicta — Domina nostra — Mediatrix nostra — Advocata nostra — tuo Filio nos reconcilia — tuo Filio nos commenda — tuo Filio nos repraesenta.

V. Vultum tuum deprecabuntur.

R. Omnes divites plebis.

Oremus. Defende, quaesumus, Domine, beata Maria semper virgine intercedente, nostram ab omni adversitate familiam, et toto corde tibi prostratam ab hostium propitius tuere clementer insidiis. Per Christum Dominum nostrum.

R. Amen.

V. Divinum auxilium sit semper nobiscum.

R. Amen.

c) In Sessionibus publicis.¹

1. In Sessione primae diei.

Pontifex ante faldistorium sibi paratum genuflexus, deposita mitra, incipit schola prosequente Antiphonam:

Exaudi nos, Domine, quoniam benigna est misericordia tua, et secundum multitudinem miserationum tuarum respice nos, Domine.

Incepto Psalmo, sedet Pontifex accepta mitra, et sic manet, quousque finiatur Psalmus et Antiphona repetatur.

Psalmus 68. Salvum me fac Deus: * quoniam intraverunt aquae usque ad animam meam.

Infixus sum in limo profundi: * et non est substantia.

Veni in altitudinem maris, * et tempestas demersit me.

Laboravi clamans, raucae factae sunt fauces meae: * defecerunt ocelli mei, dum spero in Deum meum.

Multiplicati sunt super capillos capitis mei, * qui oderunt me gratis.

Confortati sunt, qui persecuti sunt me inimici mei iniuste: * quae non rapui, tunc exolvebam.

Deus tu scis insipientiam meam: * et delicta mea a te non sunt abscondita.

Non erubescant in me, qui expectant te, Domine, * Domine virtutum.

Non confundantur super me: * qui quaerunt te, Deus Israel.

Quoniam propter te sustinui opprobrium: * operuit confusio faciem meam.

Extraneus factus sum fratribus meis, * et peregrinus filiis matris meae.

¹ Cfr. Pontific. rom. Part. tertia. Ordo ad Synodum.

Quoniam zelus domus tuae comedit me: * et opprobria exprobrantium tibi ceciderunt super me.

Et operui in ieiunio animam meam; * et factum est in opprobrium mihi.

Et posui vestimentum meum cilicium: * et factus sum illis in parabolam.

Adversum me loquebantur, qui sedebant in porta: * et in me psallebant, qui bibebant vinum.

Ego vero orationem meam ad te Domine: * tempus beneplaciti Deus.

In multitudine misericordiae tuae exaudi me, * in veritate salutis tuae.

Eripe me de luto, ut non infigar, * libera me ab eis, qui oderunt me, et de profundis aquarum.

Non me demergat tempestas aquae, neque absorbeat me profundum: * neque urgeat super me puteus os suum.

Exaudi me Domine, quoniam benigna est misericordia tua: * et secundum multitudinem miserationum tuarum respice in me.

Et ne avertas faciem tuam a puero tuo: * quoniam tribulor, velociter exaudi me.

Intende animae meae, et libera eam: * propter inimicos meos eripe me.

Tu scis improprium meum et confusionem meam, * et reverentiam meam.

In conspectu tuo sunt omnes, qui tribulant me: * improprium expectavit cor meum et miseriam.

Et sustinui, qui simul contristaretur, et non fuit: * et qui consolaretur, et non inveni.

Et dederunt in escam meam fel: * et in siti mea potaverunt me aceto.

Fiat mensa eorum coram ipsis in laqueum, * et in retributiones et in scandalum.

Obscurentur oculi eorum, ne videant: * et dorsum eorum semper incurva.

Effunde super eos iram tuam: * et furor irae tuae comprehendat eos.

Fiat habitatio eorum deserta: * et in tabernaculis eorum non sit, qui inhabitet.

Quoniam quem tu percussisti, persecuti sunt: * et super dolorem vulnerum meorum addiderunt.

Appone iniquitatem super iniquitatem eorum: * et non intret in iustitiam tuam.

Deleantur de libro viventium: * et cum iustis non scribantur.

Ego sum pauper et dolens: * salus tua Deus suscepit me.

Laudabo nomen Dei cum cantico: * et magnificabo eum in laude.

Et placebit Deo super vitulum novellum, * cornua producentem et ungulas.

Videant pauperes et laetentur: * quaerite Deum, et vivet anima vestra.

Quoniam exaudivit pauperes Dominus: * et vinetos suos non despexit.

Laudent illum coeli et terra, * mare et omnia reptilia in eis.

Quoniam Deus salvam faciet Sion: * et aedificabuntur civitates Iuda.

Et inhabitabunt ibi, * et hereditate acquirant eam.

Et semen servorum eius possidebit eam: * et qui diligunt nomen eius, habitabunt in ea.

Gloria Patri etc. Sicut erat etc.

Finito Psalmo et repetita Antiphona, Pontifex surgit, et deposita mitra, versus ad altare dicit:

Adsumus, Domine Sancte Spiritus, adsumus peccati quidem immanitate detenti, sed in nomine tuo specialiter aggregati: veni ad nos, adesto nobis, dignare illabi cordibus nostris: doce nos, quid agamus; quo gradiamur, ostende; quid efficiamus, operare. Esto solus et suggestor et effector iudiciorum nostrorum, qui solus cum Deo Patre et eius Filio nomen possides gloriosum: non nos patiaris perturbatores esse iustitiae, qui summe diligis aequitatem; ut sinistrum nos non ignorantiae trahat; non favor inflectat; non acceptio muneris vel personae corrumpat: sed iunge nos tibi efficaciter solius tuae gratiae dono, ut simus in te unum, et in nullo deviemus a vero; quatenus in nomine tuo collecti, sic in cunctis teneamus cum moderamine pietatis iustitiam, ut hic a te in nullo dissentiat sententia nostra, et in futuro pro bene gestis consequamur praemia sempiterna.

Respondetur ab omnibus: Amen.

Oremus: Omnipotens sempiterne Deus, qui misericordia tua nos incolumes in hoc loco specialiter aggregasti; mentes nostras, quaesumus, Paraclitus, qui a te procedit, illuminet et inducat in omnem, sicut tuus promisit Filius, veritatem; cunctosque in tua fide et charitate corroboret; ut excitati a temporali Synodo, proficiamus ad aeternae felicitatis augmentum. Per eundem Dominum nostrum Iesum Christum Filium tuum, qui tecum vivit et regnat in unitate eiusdem Spiritus Sancti Deus, per omnia saecula saeculorum. R. Amen.

Finita oratione Pontifex, accepta mitra, procumbit supra faldistorium praedictum, aliis omnibus genuflectentibus, et dicuntur Litaniae:

Kyrie eleison. Christe eleison.

Kyrie eleison. Christe, audi nos.

Christe, exaudi nos.

Pater de coelis Deus, Miserere nobis.

Fili Redemptor mundi Deus, Miserere nobis.

Spiritus Sancte Deus, Miserere nobis.

Sancta Trinitas unus Deus, Miserere nobis.

Sancta Maria,

Sancta Dei genitrix,

Sancta Virgo virginum,

Sancte Michael,

Sancte Gabriel,

Sancte Raphael,

} Ora pro nobis.

Omnes ss. Angeli et Archangeli, Orate pro nobis.

Omnes sancti beatorum spirituum ordines, Orate pro nobis.

Sancte Ioannes Baptista, Ora pro nobis.

Sancte Ioseph, Ora pro nobis.

Omnes sancti Patriarchae et Prophetae, Orate pro nobis.

Sancte Petre,

Sancte Paule,

Sancte Andrea,

Sancte Iacobe,

Sancte Ioannes,

Sancte Thoma,

Sancte Iacobe,

Sancte Philippe,

Sancte Bartholomaeae,

Sancte Matthaeae,

} Ora pro nobis.

Sancte Simon,	}	Ora pro nobis.
Sancte Thaddae,		
Sancte Matthia,		
Sancte Barnaba,		
Sancte Luca,		
Sancte Marce,	}	Ora pro nobis.
Omnes sancti Apostoli et Evangelistae,		
Omnes sancti Discipuli Domini,	}	Ora pro nobis.
Omnes sancti Innocentes,		
Sancte Stephane,	}	Ora pro nobis.
Sancte Laurenti,		
Sancte Vincenti,		
Sancti Fabiane et Sebastiane,	}	Ora pro nobis.
Sancti Ioannes et Paule,		
Sancti Cosma et Damiane,		
Sancti Gervasi et Protasi,		
Omnes sancti Martyres,		
Sancte Silvester,	}	Ora pro nobis.
Sancte Gregori,		
Sancte Ambrosi,		
Sancte Augustine,		
Sancte Hieronyme,		
Sancte Martine,		
Sancte Nicolae,	}	Ora pro nobis.
Omnes sancti Pontifices et Confessores,		
Omnes sancti Doctores,	}	Ora pro nobis.
Sancte Antoni,		
Sancte Benedicte,		
Sancte Bernarde,		
Sancte Dominice,		
Sancte Francisce,		

Omnes sancti Sacerdotes et Levitae, Orate pro nobis.

Omnes sancti Monachi et Eremitae, Orate pro nobis.

Sancta Maria Magdalena,

Sancta Agatha,

Sancta Lucia,

Sancta Agnes,

Sancta Caecilia,

Sancta Catharina,

Sancta Anastasia,

Ora pro nobis.

Omnes sanctae Virgines et Viduae, Orate pro nobis.

Omnes Sancti et Sanctae Dei, Intercedite pro nobis.

Propitius esto, Parce nobis Domine.

Propitius esto, Exaudi nos Domine.

Ab omni malo,

Ab omni peccato,

Ab ira tua,

A subitanea et improvisa morte,

Ab insidiis diaboli,

Ab ira et odio et omni mala voluntate,

A spiritu fornicationis,

A fulgure ad tempestate,

A flagello terraemotus,

A peste, fame et bello,

A morte perpetua,

Per mysterium sanctae Incarnationis tuae,

Per Adventum tuum,

Per Nativitatem tuam,

Per Baptismum et sanctum Ieiunium tuum,

Per Crucem et Passionem tuam,

Per Mortem et Sepulturam tuam,

Per sanctam Resurrectionem tuam,

Libera nos Domine.

Per admirabilem Ascensionem tuam,
Per Adventum Spiritus Sancti Paracliti,
In die Iudicii,

} Libera nos
Domine.

Peccatores,

Ut nobis parcas,

Ut nobis indulgeas,

Ut ad veram poenitentiam nos perducere digneris,

Ut Ecclesiam tuam sanctam regere et conser-
vare digneris,

Ut domnum Apostolicum et omnes ecclesiasticos
ordines in sancta religione conservare digneris,

Ut inimicos sanctae Ecclesiae humiliare digneris,

Ut Imperatorem nostrum custodire digneris,

Ut Regibus et Principibus Christianis pacem
et veram concordiam donare digneris,

Ut cuncto populo christiano pacem et unita-
tem largiri digneris,

Ut nosmetipsos in tuo sancto servitio confor-
tare et conservare digneris,

Ut mentes nostras ad coelestia desideria erigas,

Ut omnibus benefactoribus nostris sempiterna
bona retribuas,

Ut animas nostras, fratrum, propinquorum et
benefactorum nostrorum ab aeterna damna-
tione eripias,

Ut fructus terrae dare et conservare digneris,

Te rogamus audi nos.

*Pontifex surgit, et baculum pastoralem in sinistra
tenens, stans versus ad Synodum, dicit:*

Ut hanc praesentem Synodum visitare, disponere et
bene † dicere digneris.

R. Te rogamus audi nos.

Producens signum crucis pariter super omnes, quo facto, iterum occumbit, Litaniis perficiendis.

Ut nos exaudire digneris, Te rogamus audi nos.

Fili Dei, Te rogamus audi nos.

Agnus Dei, qui tollis peccata mundi, Parce nobis Domine.

Agnus Dei, qui tollis peccata mundi, Exaudi nos Domine.

Agnus Dei, qui tollis peccata mundi, Miserere nobis.

Christe, audi nos. Christe, exaudi nos.

Kyrie eleison. Christe eleison. Kyrie eleison.

Quibus dictis, surgunt omnes, et Pontifex deposita mitra dicit stans versus ad altare: Oremus.

Et ministri: Flectamus genua. R. Levate.

Da, quaesumus, Ecclesiae tuae, misericors Deus, ut Spiritu Sancto congregata, secura tibi devotione servire mereatur. Per Dominum nostrum Iesum Christum Filium tuum, qui tecum vivit et regnat in unitate eiusdem Spiritus Sancti Deus, per omnia saecula saeculorum. R. Amen.

Deinde Pontifex, accepta mitra, ascendit ad sedem sibi paratam in plano altaris, ita ut in ea sedens dorsum suum vertat ad altare. Et imponit incensum in thuribulum, et benedicit more solito. Diaconus dalmatica indutus, praecedentibus thuriferario et duobus Ceroferariis et Subdiacono tunicella induto, paramentis rubeis, benedictione accepta a Pontifice, cantat in loco convenienti:

✠ *Sequentia sancti Evangelii secundum Lucam.*

In illo tempore: Convocatis Iesus duodecim Apostolis dedit illis virtutem et potestatem super omnia daemonia, et ut languores curarent. Et misit illos, praedicare regnum Dei et sanare infirmos. Et ait ad illos: Nihil tuleritis in via, neque virgam, neque peram, neque panem, neque pecuniam, neque duas tunicas habeatis. Et in quam-

cumque domum intraveritis, ibi manete, et inde ne exeatis. Et quicumque non receperint vos, exeuntes de civitate illa, etiam pulverem pedum vestrorum excutite in testimonium super illos. Egressi autem circuibant per castella evangelizantes et curantes ubique.

Quo finito, liber Evangeliorum apertus per Subdiaconum portatur Pontifici per eum osculandus, qui et deinde incensatur. Quo facto Pontifex ipse ante sedem suam praedictam, deposita mitra, versus ad altare, atque alii omnes in locis suis genuflectunt. Tum Pontifex sic genuflexus incipit cantando, schola prosequente hymnum:

Veni, creator Spiritus, mentes tuorum visita: * imple superna gratia, quae tu creasti pectora.

Finito primo versu, Pontifex surgit, stans versus ad altare, sine mitra, usque ad finem hymni: similiter omnes alii cum Pontifice surgunt.

Qui diceris Paraclitus, altissimi donum Dei: * fons vivus, ignis, charitas et spiritalis unctio.

Tu septiformis munere, digitus Paternae dexteræ:
* Tu rite promissum Patris sermone ditans guttura.

Accende lumen sensibus, infunde amorem cordibus,
* infirma nostri corporis virtute firmans perpeti.

Hostem repellas longius, pacemque dones protinus; *
ductore sic te praevio, vitemus omne noxium.

Per te sciamus da Patrem, noscamus atque Filium:
* teque utriusque Spiritum credamus omni tempore.

Deo Patri sit gloria, et Filio, qui a mortuis * surrexit ac Paraclito, in saeculorum saecula. Amen.

2. In Sessione secundae diei:

Pontifex, paratus ut supra, procedit coram altari

Diacono et Subdiacono, paratis ut supra, ipsum associantibus et ibi in faldistorio ante medium altaris iuxta inferiorem gradum sibi parato genuflexus, deposita mitra, inchoat, schola prosequente, Antiphonam:

Propitius esto peccatis nostris, Domine, ne quando dicant gentes: Ubi est Deus eorum?

Finita Antiphona et incepto Psalmo, sedet Pontifex, reassumta mitra, usque ad finem Psalmi.

Psalmus 78. Deus venerunt gentes in hereditatem tuam, polluerunt templum sanctum tuum: * posuerunt Ierusalem in pomorum custodiam.

Posuerunt morticina servorum tuorum escas volatilibus coeli: * carnes sanctorum tuorum bestiis terrae.

Effuderunt sanguinem eorum tamquam aquam in circuitu Ierusalem: * et non erat, qui sepeliret.

Facti sumus opprobrium vicinis nostris: * subsanatio et illusio his, qui in circuitu nostro sunt.

Usquequo Domine irasceris in finem: * accendetur velut ignis zelus tuus?

Effunde iram tuam in gentes, quae te non noverunt; * et in regna, quae nomen tuum non invocaverunt.

Quia comederunt Iacob: * et locum eius desolaverunt.

Ne memineris iniquitatumstrarum antiquarum, cito anticipent nos misericordiae tuae: * quia pauperes facti sumus nimis.

Aduva nos Deus salutaris noster, et propter gloriam nominis tui, Domine, libera nos: * et propitius esto peccatis nostris propter nomen tuum.

Ne forte dicant in gentibus: Ubi est Deus eorum? * et innotescat in nationibus coram oculis nostris.

Ultio sanguinis servorum tuorum, qui effusus est: * introeat in conspectu tuo gemitus compeditorum.

Secundum magnitudinem brachii tui, * posside filios mortificatorum.

Et redde vicinis nostris septuplum in sinu eorum: * improprium ipsorum, quod exprobraverunt tibi, Domine.

Nos autem populus tuus et oves pascuae tuae: * confitebimur tibi in saeculum.

In generationem et generationem: * annuntiabimus laudem tuam.

Gloria Patri et Filio etc. Sicut erat in principio etc.

Deinde finito Psalmo et repetita Antiphona, Pontifex deposita mitra surgit, et stans versus ad altare dicit:

Oremus. Nostrorum tibi, Domine, curvantes genua cordium, quaesumus, ut bonum, quod in nobis a te requiritur, exequamur: scilicet, ut prompta tecum sollicitudine gradientes, discretionis arduae subtile iudicium faciamus: ac misericordiam diligentes, clareamus studiis tibi placitae actionis. Per Christum Dominum nostrum. R. Amen.

Oremus. Mentibus nostris, quaesumus, Domine, Spiritum Sanctum benignus infunde, quatenus in nomine tuo collecti, sic in cunctis teneamus cum moderamine pietatis iustitiam, ut hic a te in nullo dissentiat voluntas nostra, sed semper rationabilia meditantes, quae tibi sunt placita, et dictis exequamur et factis. Per Dominum nostrum Iesum Christum Filium tuum, qui tecum vivit et regnat in unitate eiusdem Spiritus Sancti Deus, per omnia saecula saeculorum. R. Amen.

Oremus.

Et ministri dicunt: Flectamus genua.

R. Levate.

Deus, qui nos iustitiam loqui, et quae recta sunt, praecipis iudicare: tribue nobis, ut neque iniquitas in ore, nec pravitas inveniatur in mente: ut puro cordi purior sermo consentiat, ostendatur in opere iustitia, neque appareat dolus in lingua, sed ex corde veritas proferatur. Per Dominum nostrum Iesum Christum Filium tuum, qui tecum vivit et regnat in unitate Spiritus Sancti Deus, per omnia saecula saeculorum. R. Amen.

Post haec Pontifex, accepta mitra, ascendit ad planum altaris, et sedet in sede seu faldistorio ibidem sibi parato.

Tum accedit Diaconus cum thuriferario, et Pontifex imponit incensum; deinde benedicit Diacono, qui procedens ad locum consuetum signat, incensat et cantat Evangelium, ut heri, Pontifice ante sedem praedictam sine mitra, verso ad Diaconum, stante.

✠ Sequentia sancti Evangelii secundum Lucam.

In illo tempore: Designavit Dominus et alios septuaginta duos: et misit illos binos ante faciem suam in omnem civitatem et locum, quo erat ipse venturus. Et dicebat illis: Messis quidem multa, operarii autem pauci. Rogate ergo Dominum messis, ut mittat operarios in messem suam. Ite: ecce ego mitto vos sicut agnos inter lupos. Nolite portare sacculum, neque peram, neque calceamenta, et neminem per viam salutaveritis. In quamcumque domum intraveritis, primum dicite: Pax huic domui: et si ibi fuerit filius pacis, requiescet super illum pax vestra: sin autem, ad vos revertetur. In eadem autem domo manete edentes et bibentes, quae apud illos sunt: dignus est enim operarius mercede sua. Nolite transire de domo in domum. Et in quamcumque civitatem intraveritis, et susceperint vos, manducate, quae apponuntur vobis: et curate infirmos,

qui in illa sunt, et dicite illis: Appropinquavit in vos regnum Dei.

Quo finito, et per Pontificem libro osculato, et ipso incensato, Pontifex sine mitra ante sedem praedictam versus ad altare, ac aliis omnibus in suis locis genuflexis, incipit schola prosequente hymnum: Veni, Creator Spiritus. Et dicitur totus, ut supra pag. 41, quem schola prosequitur, ut in primo die. Finito primo versu, Pontifex surgit, stans versus ad altare, detecto capite usque ad finem hymni. Simili modo faciunt omnes alii.

3. In Sessione tertiae diei:

a) Ante Sessionem.

Pontifex paratur, ut heri assistantibus sibi Diacono et Subdiacono paratis, genuflexus in saldistorio, iuxta inferiorem gradum ante medium altaris sibi parato, deposita mitra incipit, schola prosequente, Antiphonam:

Exaudi nos Domine, quoniam benigna est misericordia tua: et secundum multitudinem miserationum tuarum respice nos Domine.

Psalmus: *Salvum me fac Deus: * quoniam intraverunt aquae usque ad animam meam. Et dicitur totus, prout habetur supra in primo die pag. 32. Deinde repetitur Antiphona. Incepto Psalmo, Pontifex sedet, et accipit mitram sic manens, quousque Psalmus finiatur et Antiphona repetatur; qua repetita, deposita mitra, surgit, et stans versus ad altare, dicit:*

Oremus. Ad te, Domine, interni clamoris vocibus proclamantes, unanimiter postulamus, ut respectu tuae gratiae solidati, praecones veritatis efficiamur intrepidi, tuumque valeamus verbum cum omni fiducia loqui. Per Dominum nostrum Iesum Christum Filium tuum, qui tecum

vivit et regnat in unitate Spiritus Sancti Deus, per omnia saecula saeculorum. R. Amen.

Oremus. Omnipotens sempiterne Deus, qui sacro verbi tui oraculo promisisti: Ubi duo vel tres in nomine tuo congregati essent, te medium fore; adesto coetui nostro propitius, et cor nostrum illumina misericors, ut a bono misericordiae tuae nullatenus aberremus, sed rectum iustitiae tuae tramitem in omnibus teneamus. Per Dominum nostrum Iesum Christum Filium tuum, qui tecum vivit et regnat in unitate Spiritus Sancti Deus, per omnia saecula saeculorum. R. Amen.

Oremus.

Et ministri dicunt: Flectamus genua.

R. Levate.

Deus, qui populis tuis et indulgentia consulis et amore dominaris; da Spiritum sapientiae tuae, quibus dedisti regimen disciplinae; ut de profectu sanctarum ovium fiant gaudia aeterna pastorum. Per Dominum nostrum Iesum Christum Filium tuum, qui tecum vivit et regnat in unitate eiusdem Spiritus Sancti Deus, per omnia saecula saeculorum. R. Amen.

Post haec Pontifex, accepta mitra, ascendit ad planum altaris, sedens in sede, seu faldistorio ibidem sibi parato. Tum accedit Diaconus cum thuriferario, et Pontifex imponit incensum; deinde benedicit Diacono, qui procedens ad locum consuetum signat, incensat et cantat Evangelium, ut heri, Pontifice ante sedem praedictam sine mitra, verso ad Diaconum, stante.

✠ Sequentia sancti Evangelii secundum Matthaeum.

In illo tempore dixit Iesus discipulis suis: Si peccaverit in te frater tuus, vade et corripe eum inter te et

ipsum solum; si te audierit, lucratus eris fratrem tuum. Si autem te non audierit, adhibe tecum adhuc unum vel duos, ut in ore duorum vel trium testium stet omne verbum. Quod si non audierit eos: dic Ecclesiae. Si autem Ecclesiam non audierit, sit tibi sicut ethnicus et publicanus. Amen dico vobis, quaecumque alligaveritis super terram, erunt ligata et in coelo: et quaecumque solveritis super terram, erunt soluta et in coelo. Iterum dico vobis: quia si duo ex vobis consenserint super terram, de omni re, quaecumque petierint, fiet illis a Patre meo, qui in coelis est. Ubi enim sunt duo vel tres congregati in nomine meo, ibi sum in medio eorum. Tunc accedens Petrus ad eum dixit: Domine, quoties peccabit in me frater meus, et dimittam ei? usque septies? Dicit illi Iesus: Non dico tibi usque septies: sed usque septuagies septies.

Quo finito, et per Pontificem libro osculato, et ipso incensato, Pontifex sine mitra ante sedem praedictam versus ad altare, atque aliis omnibus in locis suis genuflexis, incipit schola prosequente hymnum: Veni, Creator Spiritus. Et dicitur totus, ut supra pag. 41. Finito primo versu, Pontifex surgens, stat versus ad altare, detecto capite usque ad finem hymni. Simili modo faciunt omnes alii. Expleto hymno omnes sedent. Pontifex sedens cum mitra Synodum his verbis alloquitur, si velit:

Venerabiles et dilectissimi fratres! Convenit, ut ea, quae ecclesiasticis officiis et sacerdotalibus gradibus, vel etiam canonicis sanctionibus propter diversas occupationes, aut (quod negare non possumus) propter nostram aliorumque desidiam, non tam plene, ut oportet, executae sunt: omnium nostrum unanimi consensu et voluntate requirantur, et humiliter coram charitate vestra recitentur:

ut quae digna sunt emendatione, ad meliorem statum, auxiliante Domino, perducantur. Et cui fortasse aliquid, quod digestum est, displicet, charitati vestrae cum benignitate et modestia intinere non differat; quatenus totum, quod synodali conventione nostra statutum fuerit vel renovatum, absque omni contrarietate, concordia sanctae pacis ab omnibus aequè custodiatur ac teneatur, ad augmentum aeternae beatitudinis omnium nostrum.

b) Oratio post Sessionem finalem.

Oremus. Nulla est, Domine, humanae conscientiae virtus, quae inoffense possit tuae voluntatis iudicia experiri, et ideo, quia imperfectum nostrum vident oculi tui, perfectioni deputa misericors Deus, quod perfecto aequitatis fine concludere peroptamus; te in nostris principiis occursores poposcimus, te in hoc fine iudiciorum nostrorum indultorem nostris excessibus speramus, scilicet ut ignorantiae parcas, errori indulgeas, ut perfectis votis perfectam operis efficaciam largiaris: et quia conscientia remordente, tabescimus, ne aut ignorantia nos traxerit in errorem, aut praeceps forsitan voluntas impulerit, iustitiam declinare; hoc te poscimus, te rogamus, ut si quid offensionis in hac Synodi celebritate contraximus, te miserante, indulgentiam sentiamus: ut in eo, quod soluturi sumus aggregatam Synodum, a cunctis primum absolvamur nostrorum nexibus delictorum; qualiter et transgressores venia et confitentes tibi subsequatur remuneratio sempiterna. Per Christum Dominum nostrum. R. Amen.



1. Ad sacratissimum Cor Iesu formula consecrationis recitanda.

Iesu dulcissime, redemptor humani generis, respice nos ad altare tuum humillime provolutos. Tui sumus, tui esse volumus; quo autem tibi coniuncti firmitus esse possumus, en, hodie sacratissimo Cordi tuo se quisque nostrum sponte dedicat.

Te quidem multi novere numquam: Te, spretis mandatis tuis, multi repudiarunt. Miserere utrorumque, benignissime Iesu, atque ad sanctum Cor tuum rape universos. Rex esto, Domine, nec fidelium tantum, qui nullo tempore discessere a te, sed etiam prodigorum filiorum, qui te reliquerunt: fac hos, ut domum paternam cito repetant, ne miseria et fame pereant. Rex esto eorum, quos aut opinionum error deceptos habet, aut discordia separatos, eosque ad portum veritatis atque ad unitatem fidei revoca, ut brevi fiat unum ovile et unus pastor.

Rex esto denique eorum omnium, qui in vetere gentium superstitione versantur, eosque e tenebris vindicare ne renuas in Dei lumen et regnum. Largire, Domine, Ecclesiae tuae securam cum incolumitate libertatem; largire cunctis gentibus tranquillitatem ordinis: perface, ut ab utroque terrae vertice una resonet vox: Sit laus divino Cordi, per quod nobis parta salus, ipsi gloria et honor in saecula! Amen.¹

V. Iesu, mitis et humilis Corde.

R. Fac cor nostrum secundum Cor tuum.

¹ Ex encyclica *Annum sacrum*, data die 25. Maii 1899, de hominibus sacratissimo Cordi Iesu devovendis.

Oremus.

Omnipotens sempiterne Deus, respice in Cor dilectissimi Filii tui, et in laudes et satisfactiones, quas in nomine peccatorum tibi persolvit, eisque misericordiam tuam petentibus Tu veniam concede placatus, in nomine eiusdem Filii tui Iesu Christi, qui tecum vivit et regnat in unitate Spiritus Sancti Deus, per omnia saecula saeculorum. R. Amen.



2. Ad purissimum Cor B. M. V. formula dedicationis recitanda.

O Cor Mariae, matris Dei et matris nostrae; Cor amabilissimum, in quo sibi adoranda Trinitas bene complacuit; Cor dignum omni veneratione et amore angelorum et hominum; Cor simillimum sacrosancto Iesu Cordi, cuius es imago perfectissima; Cor bonitate plenum et tantopere compatiens nostris miseriis: dignare resolvere glaciem cordium nostrorum; fac, ut se prorsus tradant Cordi divini Salvatoris.

Infunde cordibus nostris amorem tuarum virtutum et in eis flammam indesinentis tuae charitatis accende. Sanctam Ecclesiam tuo amore amplectere; tuere illam. Sis illi semper dulce refugium et turris inexpugnabilis contra omnes hostium incursus. Per te accessum habeamus ad Iesum; per te gratias obtineamus necessarias ad aeternam salutem. Sis nobis in necessitatibus auxilium, in afflictionibus solatium, in tentationibus robur, in persecutionibus refugium, in omnibus periculis praesidium.

Sed praesertim in hora mortis, in ultimo vitae agone, quum infernae potestates in nos irruent, ut animam rapiant; in illo terribili momento, in illa tremenda hora, a qua pendet nostra aeternitas: tunc, o tunc, Virgo clementissima, fac nos sentire teneritudinem materni Cordis tui, et magnitudinem potentiae tuae in Cor Iesu, aperiendo in ipso misericordiae fonte tutum refugium, ut pervenire possimus in coelum illumque tecum laudare mereamur per omnia saecula saeculorum! R. Amen.

V. Cor Mariae doloris gladio transfixum.

R. Amore Iesu, quo ardes, accende cor nostrum.

Oremus.

Concede, quaesumus, omnipotens Deus, ut qui in sacro beatissimae Virginis Mariae Corde gloriantes summae eius in te charitatis et maternae in nos dilectionis commemorationem recolimus, eiusdem amantissimae matris et charitatem imitemur, et patrocinia sentiamus. Per Christum Dominum nostrum. R. Amen.



Vota cum Oratione in fine Synodi persolvenda.

Ex instructione Caeremonialis romani acclamationes in Synodis dioecesanis parcius sunt adhibendae. Propterea in Synodo prima anno 1883 peracta et secunda anno 1896 coacta: sic dicta suffragia in sessione Synodi finali persoluta sunt. Acclamationes solum in tertia Synodo anno

iubilaeo 1900 celebrata et Christo Deohomini viventi, regnanti et imperanti sacra decantatae sunt. Ut in quarta Synodo Lavantina anni 1903 coadunata, ita in quinta praesenti persolvuntur *Vota cum Oratione*.

Decreto de Synodo dimittenda praelecto, Secretarius Synodi protinus procedit ad altare maius et conversus ad Synodales, Episcopo stante in throno, alta et sonora voce intonat singula Vota, et adsistentes simili concentu ea continuant.

Vota, post Synodum recitanda.

Detestamur, et abominamur omnia, et singula peccata nostra, et omnium aliorum commissa ab initio mundi usque in hanc horam, et deinceps usque ad finem mundi committenda, et si possemus, impediremus per gratiam Dei, quam supplices invocamus.

Laudamus, et approbamus omnia bona opera, facta a principio mundi usque in hanc horam, et deinceps usque in finem mundi facienda, et si possemus, ea multiplicaremus per gratiam Dei, quam supplices invocamus.

Intendimus omnia facere, dicere et cogitare ad maiorem Dei gloriam, cum omnibus illis bonis intentionibus, quas Sancti umquam habuerunt, vel habebunt, vel habere possunt.

Ignoscimus, et dimittimus ex toto corde omnibus inimicis nostris, omnibus nos calumniantibus, omnibus nobis detrahentibus, omnibus quocumque modo nobis nocentibus, vel volentibus mala.

Utinam omnes homines salvare possemus moriendo pro singulis, lubenter id faceremus per gratiam Dei, quam supplices invocamus, et sine qua nihil possumus.

Oratio.

Oremus Patrem et Filium cum Sancto Spiritu, ut sicut in nomine Sanctissimæ Trinitatis congregati, novimus, quam sit iucundum habitare fratres in unum, ita in vinculo pacis et amoris iugiter permanentes, aeterna in coelis societate perfruamur! Per Christum Dominum nostrum. R. Amen.

Cunctis, qui huius Synodi decreta fideliter servabunt et qui eidem operam contulerunt, et omnibus praesentibus et absentibus sit pax et gaudium a Deo Patre per Iesum Christum in Spiritu Sancto! R. Amen.

N. Benedicamus Domino!

R. Deo gratias, Deo gratias! Et semper dicamus: Deo gratias!

*Votis cum Oratione persolutis et praelecto decreto de Synodo dimittenda, datur ab Illustrissimo Domino Episcopo benedictio sollemnis. Qua impertita Archidiaconus, stans iuxta Pontificem, dicet alta voce: **Recedamus in pace!** Et respondebunt omnes: **In nomine Christi!***

Tunc omnes pariter surgentes, Pontificem ad ostium ecclesiae synodalis reducant, inde Reverendissimus Praesul redit in suum Palatium.

Sic omnia negotia Synodi expediuntur et conventio synodalis concluditur in nomine Domini.



Iaculatoria.

Dulce Cor Iesu, sis amor meus!

(Indulgentia 300 dierum semel in die. S. Indulg. Congr. die
21. Maii 1892).

Dulce Cor Mariae, esto salus mea!

(Indulgentia 300 dierum quoties, et plenaria semel in mense.
30. Sept. 1852).



INDEX.



Pag.

Norma et methodus agendorum in quinta Synodo dioecesis Lavantina.

Praeobservanda	3
De prima Congregatione generali	4

Hymni.

In gloriam sacratissimi Cordis Iesu	6
In honorem purissimi Cordis Mariae	7
In laudes sanctorum Angelorum	8
In laudes ss. Cyrilli et Methodii, Pont. et Conf.	9

Psalmi.

Psalmus 15. Conserva me, Domine	11
Psalmus 85. Inclina, Domine	12
Psalmus 120. Levavi oculos meos	13
Psalmus 132. Ecce quam bonum	14
De prima Sessione sollemni	17
Forma professionis fidei Tridentino-Vaticana	19
De Congregationibus particularibus	23
De secunda Congregatione generali	24
De altera Sessione sollemni	25
De tertia, quarta et quinta Congregatione generali	26
De tertia et ultima Sessione publica	27
Preces in Synodo persolvendae.	

a) Invocatio Spiritus Sancti ad initiationem et apositionem Synodi in prima Congregatione generali	29
---	----

	Pag.
b) In Congregationibus quatuor generalibus et particularibus:	
1. Ante actionem synodalem	30
2. Post actionem synodalem	31
c) In Sessionibus publicis:	
1. In Sessione primae diei	32
2. In Sessione secundae diei	41
3. In Sessione tertiae diei:	
a) Ante Sessionem	45
b) Oratio post Sessionem finalem	48
1. Ad sacratissimum Cor Iesu formula consecrationis recitanda	49
2. Ad purissimum Cor B. M. V. formula dedicationis recitanda	50
Vota cum Oratione in fine Synodi persolvenda	51
Iaculatoria	54



Univerzitetna knjižnica Maribor

S



51511



000425109



COBISS